

Da Constantinopoli, vene lettere per via de Ragusi, di oratori et bailo, di 26, zorni 3 più fresche di le altre, et tre drizate al Consejo di X in zifra

Vene l' orator dil duca di Ferrara per cose particular.

Fu ordinato far hozi Pregadi per proveder a le galie de viazi, li capitani de le qual, Baruto et Alexandria, tuti do questa matina è levati di sora porto; *etiam* far poi Consejo di X con la Zonta.

Da poi disnar adunca fo Pregadi. Et in procuratia sier Tomà Mozenigo di sier Lunardo procurator, per el sposar di sier Alvisè suo fiol in la fia de sier Alvisè Marzello qu. sier Zuan Francesco, heriede, fece un grandissimo pasto, 7 procuratori e quasi tutto el Pregadi, et io ne fui, eramo zerca 200 persone et assà done.

Fu leto una lettera di sier Lorenzo Mozenigo podestà di Montagnana, di 20. Di certo caso seguito in la villa de Migliadin de do habitavano li vicini, ma in grandissimo odio, uno Bartolomio di Leonardi et l'altro Alexandro di Periti, el qual Bartolomio da una soa colombara alta trete uno archibuso a ditto Alexandro, lo tocò in la panza, la note morite.

Et li Consieri messeno dar autorità de meter in bando el dito Bartolomio de terre et lochi con taia lire 500, et chi acuserà el compagno habbi la taia, et inteso la verità possi *etiam* meterlo in bando *ut supra* con taia lire 300 et *etiam* confiscar i loro beni. Ave: 169, 2, 1.

Fu poi leto una lettera di sier Zuan Bolani podestà di la Badia, di 16. Di certo caso seguito soto el suo precessor, se pol dir in caja propria, de uno Zuan Zampana, stava per mezo el palazzo, da uno Pugnall da Tresenta con do altri *ut in litteris*, si che tiratolo de caja su la strada lo amazono. *Item*, scrive molti banditi di terre et lochi nostri hanno recapito qui vicino in caja de Madona Diana de Contrarii et vieneno sul nostro a far danni, *videlicet* uno Zanin Miano et Lorenzin di Salvatera *ut in litteris*.

Fu posto, per li Consieri, dar autorità al ditto podestà di poter bandir quel Pugnall da Tresenta di terre et lochi, con taia lire . . . et chi acuserà li compagni habbi lire

205* Fu posto, per li Consieri, una parte contra li banditi venuti in li nostri territori a far danni, *videlicet*. . . .

Fu posto, per li Consieri, Cai di XL et Savi tutti

tuor licentia poter parlar dil secno navegar di le galie de viazi et perlongarli muda, et fo intrigata per li Avogadori per mancar un savio dil Consejo, Trivixan, et il Venier di Terra ferma.

Fu posto, per li ditti, poi una lettera al rezimento di Corphù e proveditor di l'armada zerca la segurtà di ditte galie di Baruto et Alexandria, *videlicet* vadino unite sino in Boca di Cataro e li il capitano dil Golfo con la galia di sier Hetor Contarini e sier Nadal Salomon le acompagni sino a Corfù, dove lui torni a custodia dil Golfo con 5 galie, et secondo le occorrentie per il Consejo di XII volemo possino terminar per li do terzi di le balote se dieno andar al suo viazo overo restar li; il qual Consejo di XII sia esso baylo, do consieri, proveditor di l'armada, capitano dil borgo, capitano di l'ixola, capitano dil Golfo et li sopracomiti, et possino *etiam* perlongarli la muda sicome li parerano, et in caso le vadino al suo viazo el proveditor di l'armada con quelle galie li parerà le acompagni sino al Zante et il galion e la bastarda vadi con le galie di Baruto *etiam* sino a Baruto, parendo cussì al capitano di Baruto, con altre clausule *ut in parte*; et metevano che la varia di star a Corfù vadi a conto di patroni et mercadanti, e a questo sier Francesco Barbaro, è proveditor a le biave, qu. sier Daniel contradise dicendo è danno di mercanti, *unde* fo levà tutto il capitolo di la varia. Ave: 12 non sinceri, 21 di no, 174 di la parte.

Fu posto, per li Savi tutti, do lettere una a sier Vizenzo Zantani capitano al Golfo, di quanto l'habbi a far di queste galie di viazi, e interzi la galia Salamona che li manca 40 homini, li toi a ruodolo 20 a Zara et 20 a Liesna etc. *Item* li capitani di viazi vadi a Boca di Cataro a trovar il capitano dil Golfo e avisarli la deliberation. Ave.

Fu posto, per sier Lunardo Emo, savio dil Consejo, sier Marco Antonio Corner, sier Francesco Soranzo savii a Terraferma, e li Savii ai Ordeni: essendo stà preso in questo Consejo di mandar a Famagosta 150 fanti sotto 3 caporali, et non essendo stà trovà li caporali sufficienti, sia preso che per il Collegio con li do terzi di balote sia electo un capo con 50 fanti et ducati 25 per la sua persona, et meni *etiam* li 100 per impir le compagne, et dovendo fin 7 mexi compir il tempo di Batagin Bataia, è il governor nostro, di anni 5 l'ha a star, compito li habbi, ditto capo resti in suo loco governador in Famagosta per anni 5 *ut in parte*.

Et sier Gasparo Malipiero, sier Daniel Renier, sier Alvisè Mozenigo el cavalier, sier Francesco